

# مين هناك!

كان دائماً متعلق بالسما والنجوم وكان دائماً بيسأل نفسه ازاى احنا لوحدنا الي عايشين في الكوكب ده لوحدنا كده والعالم الكبير أوي ده فاضي؟

السؤال الي كل علماء الفلك سألوه ولسه لحد النهاده بيسألوه, ماجد كان بيسأله بينه وبين نفسه كل ما يتفرج علي فلم وثائقي أو حتي فيلم خيال علمي علي التليفزيون أو يقرأ مجلة علمية أو كتاب..

بس بإمكانياته المحدوده وظروفه ماكانش عارف يوصل لحاجة غير أنه ف يوم يقابل حد من مكان ثاني غير كوكب الأرض..

من باب التغيير يعني.

ماجد درس طب قسم مخ وأعصاب ومع دراسته مابطلش قراءة في كتب ومراجع خارجية, لحد ما في يوم وقع تحت إيده كتاب غيرله حياته بالكامل..

الكتاب كان باسم " التواصل مع المجهول"

حلو الإسم وشده المقدمه الي كانت بتقول: كل ما سيتم ذكره في هذا الكتاب هو واقع تجربة شخصية, قد تتجح معك أو تفشل.. عليك بالتجربه لتعرف.

أخذ الكتاب وجري بيه علي البيت لدرجة أنه أخذ الطريق من الشغل للبيت الي طبيعي ياخذ منه ساعتين في نص ساعة بس..

فتح الباب بسرعة وأمه كانت في انتظاره بابتسامه غريبه وقالتله : أجهلك الغدا يا ماجد؟

- مش جعان يا أمي.. مش جعان
- مالك يا ابني حاجة حصلت في الشغل؟
- لا يا أمي ماحصلش حاجة بس مش عاوز أتكلم ف حاجة حالاً لو سمحتي ومش عاوز حد يزعجني الكام ساعة الجايين.

سكتت للحظة في ذهول من الحالة الي عليها ماجد لآكن الي طمنها أنه وهو بيتكلم كان شكله مبسوط.

-----

الأستاذة هاجر هي دكتورة في التاريخ والحضارات القديمة وحكاياتها الي كانت بتحكيها لابنها الوحيد طول حياته عن الحضارات القديمة والتقدم الرهيب الي صنعوا بيه تاريخهم الي مالوش تفسير حتي اليوم وحتى أن رغم التطور العلمي الي بنعيشه فيه حاجات عاجزين حتي عن تقليدها كانت عامل مساعد ليه أنه يفكر أكثر ف أننا أكيد مش لوحدنا, فيه قطعة من اللغز مفقوده..

هاجر هي الي شالت حمل تربية ماجد من بعد ما والده مات في حادث مُبهم وهو في الإعدادي

حاولت علي أد ما تقدر توزن بين شغلها وبين أبحاثها وتربية ابنها وانه يحقق نجاح لنفسه في الحياة فخورة بأنها قدرت تعمل ده بعد ما شافت ابنها من أمهر الأطباء في مجاله بشهادة الجميع.

ومن بعدها بدأت تتفرغ للبحث الي قضت أكثر من ٣٠ سنة من حياتها تدرس فيه وتسافر العالم كله تجمع معلومات عنه

ليه العالم من آلاف السنين كانوا مهتمين أوي بالتحنيط والحياة الأخرى وكان عندهم قناعة تامة بالبعث ما بعد الموت بالطريقة دي؟

لحد ما في سنة ٢٠١٦ وقع تحت إيديها مخطوطة تم إكتشافها في بيرو بتوصف بشكل دقيق مرحلة ما بعد الموت!

المخطوطة يرجع تاريخها لأكثر من ١٣ ألف سنة.. كانت جزئين ولاكن للأسف تم الوصول لجزء واحد بس منهم وفيه من المعلومات الي خلاها تسافر مخصوص لمكان الإستكشاف في رحلة دامت لأكثر من شهرين..

-----

"في الكتاب ده أنا هحكي حكايتي الي كثير هيقرئوها ويقولوا - كبر وخرف - أنا مش كاتب حكايتي دي للناس دي.. أنا كاتبها لكل واحد بيفكر وعارف أن لو الكون عبارة عن الكام مليار الي عايشين علي كوكبنا الصغير ده كان إيه لزمة الكون المهول بمجراته ونجومه؟ الكلام ده ليكم أنتم.. وعارف أنكم هتصدقوني."

إفتتاحية الكتاب الي قرأها ماجد وهو واقف ولسه ماقلعش حتي هدومه.

"كان يوم جمعة في نص سبتمبر وخرجت أسطاد علي البحر ومن عادتي لما بخرج أسطاد باخد معايا الراديو وأشغل إذاعة الأغاني.. في السهرة بيحببوا حلیم وعبد الوهاب.. دقة قديمة بقي.. وبكمل صيد مع الأغاني لحد الفجر وأرجع علي البيت.. ف اليوم ده زي أي يوم قاعد ومتسلطن مع قدك المياس والجو كان فيه نسمة هوا من بشاير خريف الأسكندرية وفجأه الراديو قلب لوش وصوت زن غريب.. قولت يمكن من الهوا أو البطاريات بدأت تفضي

البطاريات مشحونة

والإذاعات الثانية كلها شغاله عادي

رجعت تاني بالتردد لإذاعة الأغاني

لسه نفس الوش موجود..

بس كان فيه حاجة غريبة في الوش ده

كان فيه صوت أول مرة أسمع زيه

كان صوت حد بيعيط ويصرخ  
بس الصوت كان بعيد ومش واضح حتي بيتكلم عربي ولا لغة تانية  
مش فاهم حاجة من الي سامعه  
والزن في السماعه مستفزني  
ما بين التشيت الي أخذني وخرجني من الجو الجميل الي عايشه وبين السنارة الي في البحر قررت  
أسحب سنارتي وألمها وأركز مع الي سامعه ده  
الصوت مش حاجة ثابتة  
ده بيتغير يعني أنا مش بيتهيألي  
ليه فيه عياط وصريخ  
سيبت البحر ومتعته ومسكت الراديو ف إيدي وحاولت أصب كل تركيزي معاه  
وبدأت أفكر.. هل ده مسلسل إذاعي مثلاً؟  
إذا عتين دخلوا علي بعض ف حصل التشويش ده  
طب ليه مافيش تغيير لأكثر من ربع ساعة صراخ وعياط!!  
وفجأة وفي هدوء شط الأسكندرية وتركيزي مع الصوت سمعت كلمة واحدة فهمتها: اهربوا!!!  
ومن بعدها رجع تاني الكلام كله مش مفهوم..  
اهربوا؟  
أنا صاحي ولا بحلم  
فيه إيه؟  
قفلت كل حاجة وحطيت حاجتي في العربية ومسكت الراديو في إيدي ورجعت علي البيت  
طول الطريق نفس الكلام ونفس التشويش وللحظة واحدة الإذاعة ماتظبطتش  
مابدهاش بقي  
خبطت علي جاري زي المجنون وخذت منه الراديو بتاعه  
شغلته وظبطت التردد الإذاعة شغاله عادي جداً عليه مافيش أي تشويش  
حطيت الجهازين أدامي يمكن أنا ظابط حاجة غلط في الراديو عندي.. كل حاجة متطابقة!!  
الفجر أذن وأنا متيح للراديو بحاول أفهم أي حاجة.. مافيش جديد  
من كتر التركيز والصدمة نمت

مادريتش بنفسي غير وأنا صاحي الساعة ١٠ الصبح

الراديو فصل شحن

قومت من علي الأرض ببص حوليا الدنيا ساكتة وكان الناس اختفت بعربياتها بدوشتهم  
غريبة..

يمكن كنت بحلم فعلاً

غسلت وشي

ورocht للراديو حظيته يشحن علي ما جهزت الفطار علشان أسمعلي أغنيتين هادين وأنا بفطر

حطيت الراديو جنبي وخايف أفتحه

خايف أطلع ماكنتش بحلم

وخايف حتي أني أطلع كنت بحلم

شغلت الراديو وظبطته علي تردد إذاعة الأغاني..

مافيش صوت طالع

لا تشويش ولا غيره

نفس الصمت الي موجود ماتكسرش بزنه واحده حتي

حركت المؤشر يمكن الراديو الأثري ده خلاص كده جاب آخره

كل حاجة شغاله تمام معايا والراجل لسه في عمره باقي

جربت الإذاعة علي راديو جاري

شغاله برودو عادي جدا..

كده أنا ماكنتش بحلم.. كده فيه حاجة بتحصل أنا مش فاهمها

سيبت الراديو شغال علي نفس وضعه الصامت ده ووصلته بالشاحن يشحن ونزلت شغلي

وطول الطريق دماغي بتودي وبتجيب

طب هرجع البيت ألاقي كل حاجة رجعت لطبيعتها

ولا هرجع أسمع الصراخ والعياط ولا فيه إيه!

قضيت اليوم في الشغل ماعرفش قضيته ازاي

ورجعت البيت

بفتح الباب لأقيت صوت غريب شغال

المرة دي الصوت واضح بدون أي تشويش

نفس الصراخ

بس المرة دي بصوت واضح مش صوت بشر

صوت غريب..

الصوت بكرر كلمة واحدة بس : اهربوا !! بس اكتشفت أنه بيقلها بلغات العالم..

فهمت منهم العربي والإنجليزي والأسباني علي أد دراستي

والباقي أكيد لغات تانية أنا مش فاهمها..

طلعت قاموس الإيطالي والألماني ولاقيت توقعي صح..

ليه اهربوا؟

وليه التردد ده؟

وفيه إيه؟

فيه إيه؟

أخذت الراديو ونزلت بيه لمحل الإلكترونيات الي علي ناصية الشارع

صاحب المحل صاحبي وعشرة سنين

وهو الي أهداني الراديو ده بعد حرب أكتوبر وكان قال لي أنه عزيز عليه لأنه من ريحة جده

قولت أنزل أشوف إيه حكاية ريحة جده ده الي هيطيرلي عقلي

وصلت المحل وبخبط علي الباب لاقيته قاعد علي الكرسي مش بيتحرك

فتحت ودخلت

مالك يا فتحي؟

مبلم ليه كده يا حاج؟

حاجه حصلت لعيالك أو أحفادك؟

.. مافيش رد

هزيتة جامد لدرجة أنني خوفت يموت ف إيدي..

فجأة انتظر من مكانه وقال بنبرة صوت رعبتي: اهربوا!!

من الخضة وقعت الأرض والدنيا لفت بيا وحسيت أنني خلاص دي نهايتي..

فتحي قام من علي الكرسي وجري عليا يقومني:

قوم يا محسن مالك حصل لك إيه..

أنت هنا من إمتي؟

هو انا كنت نايم ولا إيه؟

جواب ازازة مياه ودلقها علي راسي وقتها بدأت أفوق شوية وأستوعب الدنيا من حوليا

وأول حاجة نطقت بيها:

- فتحي أنت كويس؟

- أيوه يا محسن أنا كويس معلش يا صديقي أنا شكلي كنت نايم وماخدتش بالي أنك هنا

- لا لأ أنت كويس؟ أنا دخلت عليك لاقت عينك مفجله ومش بتربش وكلمتك كتير مارديتش عليا

ولما حركتك جامد قولت اهربوا بصوت غير صوتك وبعدها أنا مادريتش بالدنيا

- أنت بتقول إيه يا محسن؟ أنا آخر حاجة فاكرها أنني كنت قاعد بتفرج علي ماتش الزمالك.. الولد

رضا عبد العال ده مش عارف هيجيلنا تاني زيه مين لما يعتزل يا محسن.

- سيبك من الزمالك دلوقتي وتعالى نقعد علي القهوة فيه حاجة بتحصل يا فتحي غلط وأنا خايف

ومش فاهم حاجة

- أنت وشك مخطوف كده ليه يا محسن أنت تعبان يا صديقي نروح نكشف؟

- يا سيدي والله أنا كويس وزى البمب بس ريحني واقفل المحل وتعالى نقعد علي القهوة..

- أدينا طلنا وقعدنا علي القهوة يا سيدي وشربت العناب بتاعك, ها بقي احكي لي إيه الي مخوفك

كده؟

- هحكلك.....

- قوم يا محسن وهات الراديو بتاعك معاك الكلام هنا ع القهوة مش هينفع

- هنروح فين

- هنرجع المحل, مافيش شغل النهارده

- يلا بينا...

- أنت أول مرة يحصل معاك الموقف ده كان إمتي؟

- إمبارح زي ما حكيتلك كانت أول مرة الموضوع ده يحصل

- ماصادفش معاك في مرة أن الراديو اشتغل وأنت قافلته؟

- مافتكرش بس ليه السؤال ده؟

- أبويا الله يرحمه كان بيحكلي حكاية وكنت مفكره بيخوفني بيها أن الراديو ده عليه لعنة وأن

جدي حاول يبيعه أكثر من مرة بسبب اللعنة دي وماعرفش وكان بيرجع ليه تاني..

ولما جدي اداه لأبويا قال له الراديو ده مايتباعش يا راضي وإلا هتندم باقي عمرك..

حتي أبويا وهو بيديني الراديو قال لي لو جه اليوم يا فتحي والراديو ده مابقاش له قيمه اوعي

ترميه أو تهمله..

لو تفتكر يوم ما ادبتهولك قولتلك الراديو ده غلاوته من غلاوتك عندي وأنت قعدت تتريق

علي..

المهم أن أبويا ف مرة واحنا نايمين وكان دائماً بيحط الراديو جنبه حتي لو مش مشغله لاقيته  
بيزعق في أمي جامد في نص الليل  
صحيت من نومي علي صوته

لاقيته بيقول لأمي مش قولتلك ماتلمسيش الراديو ده طول ما أنا عايش  
وهي تحلفله والله ما لمستته ولا قربتله يا راضي أنا كنت نايمه جنبك  
رد عليها وقال لها يعني هو اشتغل لوحده؟!!

وهما بيتكلموا سمعت الصوت الي أنت بتقول عليه ده..

تشويش وزن وصوت غريب بيصرخ في الراديو

بس وقتها الكلام كان عربي كله الي سمعته

"إنهم قادمون.. بلا رحمة.. اهربوا"

وبعدها الكلام اكرر بلغات تانيه

أبويا عمري ما شوفته عصبي كده

وهدوء غريب من أمي ماتعصبتش عليه وكانت بتحاول تمتص غضبه ده

لأنها عمرها كله مازعقش ليها أو ليا.. أنت عارف يا محسن عمك راضي كان هادي جداً

ومابيحبش الصوت العالي.

- يا نهار مش فايت.. من أيام عم راضي ؟

- مش بقولك الراديو ده ملعون..

- ملعون إيه يا فتحي ده تردد وراديو يعني جدك كان بيقول ملعون لآكن احنا العلم اتطور..

ده تواصل بموجات الراديو يا فتحي.. بس مين الي طول السنين دي كلها بيعت نفس الرسالة

ومهتم أوي بوصولها لدرجة أنه يكررها بكل اللغات؟

أنت مستوعب يا فتحي الرسالة دي لو بجد أننا بنستقبل تردد من بره الأرض؟

- بره الأرض إيه يا محسن صلي علي النبي كده هو ممكن يكون فيه حاجة كبيرة بتحصل آه بس

مش لدرجة بره الأرض يعني..

- والصوت الي ماسمعناش زيه طول عمرنا؟

والكلام الي بيتكرر من أيام جدك؟

مين هيعيش عميرين ولا ثلاثة يكرر نفس الجملة بكل اللغات بالصوت ده والصرخة الي تقطع

القلب دي؟

- ماتوغوشنيش بقي أنا مش حمل تفكير في حرب الكواكب يا محسن أنا راجل صاحب مرض

ورجلي والقبر.

- طب هنعمل إيه؟

نكسر الراديو وخلص؟

هو فاضل ف العمر أد إيه علشان نفكر في الي هيحصل في المستقبل؟

- خايف نكسره تحل علينا اللعنة يا محسن

- ماحنا لو فضلنا نفكر فيه وهو معانا كده هنتلحس يا فتحي أنا مش هبيت الراديو ده ف بيتي يوم

واحد تاني.

- طيب أنا عندي فكرة.. احنا ناخذ الراديو الملعون ده ونرميه في البحر.. ويبقى اسمنا ماكسر نهوش واتخلصنا منه؟
- أي فكرة أنا موافق عليها إلا أنه يفضل معانا..

وبعد ما اتفقتنا علي ده.. أخذنا الراديو بالفعل ورميناه في البحر

روحنا واحنا مش عارفين الي عملناه ده صح ولا غلط

روحنا واحنا بنفكر في الراديو والصوت الي كان خارج منه..

روحنا ماحدش فينا كلم التاني طول طريق الرجوع..

فتحي طلع شقته.. وأنا سيبته وروحت شقتي

وأول ما فتحت الباب رجعت من تاني أسمع دوشة الشارع والناس وكلاكس العربيات

وكأني كنت في صندوق معزول وخرجت منه..

مش عارف رجعت للطبيعي ولا مش هرجع أعيش حياتي طبيعي تاني

رجعت وكلي خوف من لعنة الراديو الي مستنيها تصيبني في أي لحظة..

رميت نفسي علي السرير من التعب.. ونمت.

صحيت الصبح

حاسس بنشاط غير طبيعي

وكأني نمت أيام

في الحقيقة أنا فعلاً كنت نايم أيام

بصيت في النتيجة لاقيتني نمت أربع أيام كاملين..

ماعرفش ازاي.. قومت أخذت دش بسرعة ولبست ومن غير فطار ولا يحزنون نزلت أجري أشوف

فتحي

روحت المحل عنده لاقيته مقفول ف طلعت له الشقة..

خبطت كتير وناديت كتير ومافيش رد

نزلت جبت اتنين شباب من علي القهوة يكسروا الباب

ومجرد ما دخلت شमित ريحة لحد اللحظة الي بكتب فيها الكتاب ده ماراحتش من مناخيري

لاقيت فتحي هيكل عظمي متحلل مافيهوش ذرة لحم أو جلد..

لاقيت صاحبي الي كان معايا من كام يوم جثة متحللة بقالها سنين

والغريب أن الطب الشرعي قال في تقريره أن الجثة مش جثة فتحي دي جثة جده



والأغرب أن التقرير قال أن عمر الجثة دي يرجع لأكثر من ألفين سنة..

صاحبي فين؟

لحد اللحظة ماعرفش

ولحد اللحظة مش عارف إيه الي حصل ولا إيه الي هيجصل..

بس الي متأكد منه أن فيه حاجة بتحصل أنا مش قادر أستوعبها

ومش عارف الأيام الجايه هيجصل ليا فيها إيه

أنا كتبت الكلام ده علشان لما أموت يمكن حد ياخذ باله أو يقدر يحل اللغز الي خفت أكمل فيه

لأني جبان خفت أسأل ( مين هناك ) "

-----

الكتاب لشخص ماكتبش غير الكتاب ده بس

الأستاذ محسن عبد المقصود صاحب الخمسون عام

من الأسكندرية - سيدي بشر

معايا الاسم والعنوان والكتاب تم نشره من ٦ سنين يعني مش زمن

وأنا لابس زي مانا ليه مانزلش أقابل الراجل ده وأسمع قصته العجيبة دي بنفسي؟

حوار دار في رأس ماجد.. قصة خارقة للطبيعة صاحبها بياكد أنها حصلت ليه بالفعل

ماخدش وقت في التفكير

- أمي أنا نازل الإسكندرية

- خير يا ضنايا فيه إيه؟

- مافيش يا أمي لما أرجع هبقي أحكيك كل حاجة

- أنت ماكلتش حاجة من الصبح يا ابني كل لقمة وروح مكان ما تحب

- مافيش وقت يا أمي الموضوع مستعجل ولازم أنزل حالاً

- طيب أصبر ألبس وأنزل معاك لو الموضوع ضروري كده

- لأ يا ست الكل مش مستاهل والله دي حاجة ممكن تكون بلا قيمة

استريحي انتي ولما أرجع نبقي نتكلم

الطريق من طنطا للأسكندرية فات كأنه كام متر رغم مسافة ال ١٥٠ كيلو تقريباً ما حش ما جد بالطريق  
من كتر تفكير في قصة عم محسن وإيه ممكن يحصل لو لقاه فعلاً وطلع كلامه صح!  
بعد ما وصل سيدي بشر نزل من عربيته وبدأ يلف في كل شارع وكل مكان لحد ما وصل عنوان عم  
محسن.. طلع لشقته وخط عليه.....

---

- مين؟
- ماجد
- ماجد مين؟
- أنا جايك من طنطا يا عم محسن بخصوص قصتك الي نشرتها.
- روح يا ماجد مش هتلاقي حاجة تفيدك هنا.
- معلش يا عم محسن أنا عارف ومقدر الي حضرتك مريت بيه وده الي جابني ليك من طنطا.. أنا مصدق كل كلمة كتبتها.
- هفتح لك الباب وهتدخل.. لو كلامك ما عجبنيش هتخرج من غير ما توجع قلبي.
- أنا تعبت من كتر الكلام مع الصحفيين والي عاوزين يعملوا برامج ناجحة علي حساب الي مريت بيه.
- ماتقلقش يا عم محسن أنا موافق علي كل شروطك وأنا دكتور مش حصفي ولا شغال ف التليفزيون.
- اتفضل يا دكتور..
- تشرب إيه؟
- ولا حاجة أنا مش جاي أشرب أنا جاي أسمع.
- ماينفعش يبني أنت جاي من بلد تانية وطريق وسفر, خد نفسك الأول كده وهعملك ليمون وهحكلك الي عاوز تعرفه.
- شكراً لحضرتك ماتتعبش نفسك.
- خد الكتاب ده إقرأ فيه شويه علي ما أعملك الليمون.. ولا تشرب شاي ولا قهوة؟
- لو كان لابد يبقى قهوة سادة بدون تكليف.
- أحلي كباية قهوة تركي لأحلي دكتور في مصر.....
- ماقولتليش يا دكتور, عرفت عنواني مين؟
- والله يا عم محسن أنا قرأت قصتك من كام ساعة وماقدرتش أصبر ف جبت عربيتي وجيت علي سيدي بشر وفضلت أسأل علي عنوانك في كل الشوارع لحد ما وصلت ليك.
- ياه ده واضح أن الموضوع مهم أوي!
- أكثر مما تتصور يا عم محسن, أنا مش جاي علشان قصة عجبتي.. أنا جاي علشان حلم حياتي والسؤال الي عشت عمري كله أدرسه وأفكر فيه لقيت ليه دليل في قصتك.
- وإيه الحلم الي يمرطك بالشكل ده يا دكتور؟
- أننا مش عايشين لوحدها في الكون يا عم محسن.. أن فيه غيرنا يا بيراقبنا يا عايش في مكان ثاني مش عارفين نوصل لبعض.

- مابلاش تفكر في الموضوع ده كثير يا ماجد يا ابني..خدها نصيحة من واحد خاف واتجرء وجري وواجه ومات وصحي!  
- مات وصحي؟

- ماتاخذش ف بالك.. القهوة جاهزة هجيبها وأجيلك أهو..  
- السؤال الأهم عندي يا عم محسن هو أن قصتك انتشرت ازاي وخلال الفترة دي هل جد جديد فيها ولا انتهت مع آخر كلمات كتبتها ف الكتاب؟  
معلش أنا عارف أني رغاي وبسأل كثير أوي بس فعلاً أنا عندي ألف سؤال وسؤال عاوز أسألهم كلهم ف نفس الوقت فاعذرني.  
- ولا يهمك.. هجاوبك علي كل أسألتك بس الأول علي ما تشرب قهوتك هيكون عمك فتحي وصل علشان تسمع مننا احنا الاتنين لتقول كبر وخرف زي ما جمهور الأهل بيقول.  
- ههههههه لا طبعاً أنت الخير والبركة يا عم محسن ربنا يدك الصحة وطول العمر,  
بس ثواني.. عم فتحي عايش؟

في الكتاب ماقولتش كده!

- أصبر علي رزقك يا دكتورالكلام كثير وخليك فاكرك أنك وقت ما دماغك تتعب من الي هنقوله تقدر تمشي في أي وقت تحب.. ياما غيرك جم ومن أول كلمتين ضحكوا علينا ومشياوا وغيرهم الي جه في بيتنا يقول لنا أننا مختلين عقلياً.. ماتقلقش مش هنزل منك لو مشيت.  
- لا طبعاً أنا معاكم من أول كلمة لآخر كلمة..  
عارف يا عم محسن لما كنت بسمع وبشوف حكايات الأمريكان عن Roswell والفضائيون سنة ٤٧ كنت بقول هو ليه مافيش أي حاجة عندنا هنا الواحد يقدر يتكلم ويتناقش فيها زيهم..  
هو مغضوب علينا حتي من الي مانعرفهوش ههه  
- بس الي حصل معايا أنا وعمك فتحي مش فضائيين شوفناهم في السما ولا شاوروبا لينا من مركبة فضائية.. احنا اتأذينا يا دكتور أذي كبير ومش عارفين له علاج ولا حتي سبب!  
- هو فين عم فتحي؟  
- عمك فتحي يا سيدي في محل الإلكترونيات بتاعه بيحاول يشوف حل في الراديو الملعون ده.  
- الراديو الملعون!!!! الي اترمي في البحر؟  
- أيوه هو بعينه.. الي البحر ما عجبوش هديتنا ورجعوهولنا لحد عندنا تاني.  
- لاااا الموضوع كده كبير أوي وأنا بدأت أتوه منك.. يعني إيه رجعوهلكم تاني؟  
- بعد شهرلما لاقينا الجثة وخادوها ماعرفش لفين, ناس جت لي من حبايبنا قالولي ماتكلمش عن الجثة دي ولا عن أي حاجة تخصها.. قالولي باللفظ كده "هبل زي مانت عاوز ف قصتك بس القصة تنتهي بأنك رجعت بيتك وماتدوررش علي صاحبك لمصلحتك"  
طبعاً أنا خدت كلامهم أوامر وأنا مش فاهم حاجة لحد ما بعد شهر وأنا راجع من شغلي لاقيت فتحي قاعد في الصلاة ماسك الراديو وعمال يقول اهربوا اهربوا اهربوا..  
قعدت أهز فيه واخبطه علي دماغه بكف إيدي لحد ما فاق وطبعاً كالعادة مايعرفش الشهر ده كان فين ولا إيه جابه البيت عندي وآخر حاجة كان فاكرها هي أننا رجعنا من اليوم إياه وطلع شقته ونام.

- [illegible]

- مش هتقدر غير وأنا بسلم عليه وهو خارج من باب البيت.. ما كلهم بيبدئوا محترمين وينهوها بإهانتنا.. أنت بقيت جبله يا محسن؟
- اللهم طولك يا روح.. فتحي أنا هبدأ أزهق وأنت عارفني لما بزهق ممكن أقول إيه وأعمل إيه.. تمالك أعصابك ولما أقولك الراجل غير الباقيين يبقي تسمع الكلام وتعتذر له.
- حاضر، أنا آسف يا ابني.. الي شوفناه من الناس الكام سنة الي فاتوا كرهونا ف جنس البشر كله.
- أنا مقدر كلامك كله والله يا عم فتحي ومش زعلان منه، واضح أن التجربة كانت أصعب بكثير من مجرد كلمتين اتكتبوا في كتاب.. أنا زي ابنك وأكد مش زعلان.
- تمام هسيبكم بقي مع بعض وأقوم أعمل لنفسي كباية عناب أعملك حاجة يا فتحي؟ وأنت يا دكتور؟
- إعملي معاك عناب برودو بس سكر زيادة.
- وأنا كمان كباية بن زي الي فاتت دي مادوقتش في جمالها الحقيقة يا عم محسن تسلم إيدك.
- من عنيا يا دكتور.
- منورنا يا دكتور..
- ماجد.. إسمي ماجد يا عم فتحي.
- منورنا يا دكتور ماجد ومنور الإسكندرية كلها.. ماتزعلش من كلامي يا ابني احنا خلاص رجلنا والقبر ومش حمل زعيق وإهانة من الناس.
- لا والله يا عم فتحي أنا مبسوط جداً أناي قاعد معاكم والله وحاسس أد إيه أنتم طيبين جداً وكأنكم أهلي.
- ده يشرفنا يا دكتور.. أأمرني محتاج مننا إيه؟
- أنا قرأت القصة الي انتشرت علي لسان عم محسن وأنا طول عمري بحلم ف يوم أوصل وأعاصر حاجة فيها تواصل من مخلوقات غير الي عايشين علي الأرض ومش هلاقي فرصة أحسن من دي.. علشان كده أنا مصدق كل كلمة حتي -سامحني يعني- لو كذب.. أنا عاوز أصدق الحكاية دي لنفسي قبلكم.
- تمام يا ماجد واحنا هنحكليك الي حصل معانا ودي هتكون آخر مرة نتكلم فيها بس وأنا بتكلم لو لاقيتني سكت ماتتكلمش.. نهائي.
- !! حاضر!
- بعد ما رميت الراديو في البحر أنا والحاج محسن ورجعت البيت وبستعد للنوم سمعت خبط علي الشباك.. قولت عادي حد معدي ف الشارع وبيستظرف..
- مش ناقص ضغط عصبي.. بس الخبط ده اتكرر أكثر من مرة الي نرفزني وخلاني أشتم: امشي يا حيوان وبطل استظراف.. لو حد محترم هيجيلي من الباب.
- فجأه لاقيت دخان داخل من الشباك بس من غير ريحة وكمان متلون مش دخان طبيعي.. خفت وقومت فتحت الشباك لاقيت نور خبط ف عيني كأن الشمس نزلت أدام الشباك..
- وصوت موتور عالي جداً خلاني استغرب ازاي الشارع ماصحيش منه ولا من النور ده! يمكن ده حلم طيب؟

سحبت بندقية الصيد بتاعتي وطلعت من الباب أشوف فيه إيه برّة, لاقيت نفسي بتسحب للنور ده من غير ما اتحرك من مكاني.. مش عارف أصرخ.. مش عارف أفتح عيني.. مش عارف حتي احرك إيدي الي البندقية وقعت منها لا إرادي..  
سلمت الواقع وقولت الي يحصل يحصل بقي..  
أي حاجة حصلت من بعد اللحظة دي للحظة ما محسن فوقتي هنا ف الشقة مش فاكّر منها أي حاجة..

لما محسن فوقتي ولقيت الراديو ف إيدي وكمان لما محسن حكالي علي الجثة الي كانت ف شقتي, كل ده دخلني ف نوبة عياط لدرجة أنني أغمي عليا ومحسن كلم دكتور جاره ف العمارة يكشف عليا..

- 
- فتحي فيه إيه يا دكتور غانم
  - دي أعراض Panic Attack يا عم محسن
  - هو الحاج فتحي اتعرض لصدمة قوية قبل ما يدخل في الحالة دي؟
  - أيوه يا دكتور شوية زعل مع أولاده..
  - محتاجين نعمل فحوصات علي القلب يا عم محسن والمخ.. أنا ملاحظ حاجة غريبة مش هتبان غير بالأشعة والفحوصات الي كاتبها لك في الورقة دي وتعرضه علي دكتور قلب في أقرب وقت.
  - ليه؟ هو فيه حاجة كبيرة؟
  - كله هيتحدد بعد الحاجات الي قولتلك عليها.. أنا دكتور أسنان ومش هفتي في حاجة..
  - الحقنة الي أخذها -المفروض- هترجع نبضات قلبه.
  - ترجعها؟ مش فاهم حاجة يا غانم يا ابني هو فتحي ماله!!؟
  - الحاج فتحي مش سامع له نبضات قلب يا عم محسن.. لولا أنه بيتنفس أدامي كنت قولتلك البقية في حياتك.
- 

- بعدها بكام ساعة فوقت ومحسن حكالي الي حصل وأخذني وروحنا نعمل الفحوصات.. واكتشفنا أن القلب عندي مش شغال!
- الي قاعد أدامك وبيكلمك ده قلبه مش شغال يا دكتور!
- روحنا لأكثر من دكتور وأكثر من معمل ومركز أشعة وكله وصل لنفس النتيجة..
- كل وظائف جسمي شغاله بدون القلب..
- والي يقهر أن كل دكتور نروحله عاوز يستخدمني فار تجارب وعاوز يفتح ويشوف فيه إيه..
- وأزيدك من الشعر بيت؟
- محسن هو كمان...
- فتحي قولتلك مليون مرة النقطة دي خط أحمر وماتتحكيش.. مش كل مرة تخلف الوعد!
- أنا آسف يا صاحبي اندمجت ف الكلام والله غصب عني

.. معلى يا دكتور هنعدي النقطة دي.

- مش عاوز أكون متطفل بس هو عم محسن ماله؟ وليه اتضايق ومش عاوزك تتكلم عن الحاجة دي؟
  - ماجد.. أنت جاي تسمع وتناقش علي راسنا.. لآكن ماتخطاش النقط الي بنحطهاك.. مش علشاننا علشان ماتتأذاش بسببنا زي غيرك.
  - عمك محسن عنده حق.. والي هيقوله ماتناقش فيه.
  - آسف يا عم فتحي.. آسف يا عم محسن.. أنا من الذهول بس مش مستوعب كل ده.
  - ماتأسفش يا دكتور.. (بابتسامة مربية)
- 

السكوت حل فجأة علي الجميع..

فتحي باصص في الأرض

ومحسن مغمض عينه

وماجد خايف يتكلم زي ما قال له فتحي أنه لما يسكت مايتكلمش خالص, وأخذها فرصة يحاول يجمع الي انتقال ويستوعب الموقف وعقله بيقول له كفاية لحد كده ويروح سليم وفضوله مخليه عاوز يكمل للنهاية مهما كلف الأمر...  
بعد ساعة.. الكل ثابت علي حاله..

كسر الصمت تليفون بيرن..

- أيوه يا أمي (بصوت يكاد يكون مش موجود)
  - ماجد؟ أنت فين يا حبيبي اتأخرت ليه؟
  - هكلمك بعدين يا أمي (بنفس الصوت)
  - حبيبي أنا مش سامعاك.. بتقول إيه؟
  - سلام دلوقتي يا ماما (بصوت من ضعفه وخوفه ماخرجش منه أصلاً)
- 

- يلا بينا يا محسن..

- يلا بينا يا فتحي..

- ورانا يا دكتور ومانسمعش صوتك.

---

نظرات متعاقبة للاثنين من ماجد في ذهول من شكلهم الي اتقلب علي النقيض..

هو أنا غلطت لما دخلت في مغامرة مش حاسبها واندفاعي ده هيكون سبب في أذي ليا أو لا قدر الله ممكن يوصل لوالدي؟

هو أنا غلطت لما فرحت أوي بالموضوع من غير ما أحسب أنا رايع لمين وممكن يعملوا معايا إيه؟

أنا خايف.. وخوفي ده فكرني بالخوف الي قاله عم محسن في آخر جملة في قصته.. أنا علوز أرجع وأنسي الي حصل.. أنا جبان ومش علوز أعرف مين هناك.

---

بجسم مفروود وخطوات كلها ثبات كرياضي في العشرين من عمره, محسن وفتحي فتحوا باب الشقة ووراهم ماجد الي من الخوف مش قادر يسألهم هما رايعين فين..

خرجوا من الشقة واتجهوا لمحل الإلكترونيات بتاع فتحي

فتح الباب ودخلوا وقفل وراهم بالمفتاح..

فرد كل الستائر والمكان أصبح عتمة , اللهم إلا بصيص من شعاع شمس الغروب هربان من الفواصل بين الستائر..

فتح الخزانة وخرج منها جهاز راديو.. وحطه أدمهم علي المكتب..

- فاضل أد إيه يا محسن؟
  - ربع ساعة علي بداية الإرسال!
  - لو عندك أي سؤال يا دكتو تقدر تسأله في الربع ساعة دي..
  - أنا بدأت أخاف منكم.. أنا خايف تأذوني..
  - مافيش أي أذي هيطولك إلا لو عديت حدودك, علشان كده قولناك ماتتكلمش.
  - هو هيجصل إيه بعد الربع ساعة؟
  - هنختفي.
  - يعني إيه هتخنفوا؟
  - لأ هنختفي.. احنا الثلاثة.
  - يعني إيه هنختفي إحنا الثلاثة؟
  - هتعرف في وقتها.. وماتخافش هترجع زي ما كنت.
  - ماخافش إيه في فيلم الرعب ده, أنا مرعوب!
  - تقدر تهرب حالاً لو حابب.. ماحدش غصبك علي حاجة.
  - أنا فعلاً مش هقدر أكمل.. أنا آسف علي أي إزعاج.. أنا همشي.
  - مع السلامة يا دكتور.. إهرب.
  - فرصة سعيدة يا عم فتحي أنت وعم محسن..
- 

مد إيديه بس كأنه مش موجود.. لا سمع رد ولا شاف حركة.. أخذ بعضه وطيран علي عربيته.. وفي لمح البصر كان وصل مدخل طنطا..

ركن العربية تحت البيت

ومجرد ما فتح باب الشقة وشاف أمه قاعدة مستنيه جري حضنها وبدأت في نوبة عياط..

- وحشتيني أوي يا أمي
- مالك يا ضنايا بتعيط ليه
- وحشتيني أوي.. أوي
- يا ابني ماتقطعش قلبي مالك.. أنت ماسيبتنيش غير كام ساعة
- أنا اكتشفت أني جبان أوي يا أمي



- أنا كنت مفكر نفسي عنتر زماني وأني ياما هنا وياما هناك  
النهارده أنا اكتشفت أنني أضعف وأجبن من عيل رضيع.
- طيب اهدا بس يا ضنايا هعملك كوباية شاي تروق أعصابك كده واحكي لي إيه حصل..
  - ولا أقولك.. هقوم الأول أحضرلك العشاء شكلك مادوقتش الأكل من الصبح.
  - ياريت والله يا أمي أنا حاسس أنني هموت من الجوع
- 

في الوقت الي أمه دخلت توضب ليه الأكل, فرد رجله علي الكنبه ودماعه فجأه بدأت تفكر وتهدا..  
بس مالحقش يفكر في حاجة ولا يوصل لحاجة.. عينيه قفلت وراح في النوم.. أو شكله قال أنه راح  
في النوم!

---

- ماجد.. إصحي يا ماجد... يا ماجد..
  - (في فزع) إيه يا أمي فيه إيه؟!!!
  - أنا علي ما رجعت من المطبخ لاقيتك نايم ف قولت أسيبك ترتاح شوية هتصحي تاكل.. بس طول الليل عمال تزعق وتقول "اهربوا.. اهربوا اهربوا"
  - طططت عليك وغطيتك كويس وقولت يمكن من ضغط اليوم والي حصل ليك ماعرفهوش خلاك بتهلوس مع أنك أول مرة تعملها..
  - بس حالاً لاقيتك بتكرر نفس الكلمة ثلاث مرات بردو بس باللاتيني!!
  - أنت تعرف حاجة عن الحروف اللاتينية أصلاً يا ماجد؟
  - والله يا أمي ماعرف غير العربي والإنجليزي وكلمتين ألماني علي أدي كده..
  - بس أنت متأكد من أنني قولتها باللاتيني؟ والساعة كام حالاً أصلاً!؟
  - عيب يا واد هو أنا ضيعت عمري في مطعم؟ (قالتها بكل ثقة وابتسامة غرور تفك بيها الجو وتحاول تشيل الضغط والخوف الي جواها وهي شايفة ابنها بيتغير حالة أدام عينيها للأسوء)
  - والساعة دلوقتي ١١ الصبح.. نصحي بقي ونفوق كده علشان تفطر.
  - ١١؟ الشغل ماحدش اتصل؟
  - شغل إيه دلوقتي, أنت مش هتخرج من باب البيت غير لما أفهم كل حاجة حصلتلك من ساعة ما رجعت من الشغل امبارح.
  - حاضر يا أمي هحكلك كل حاجة بس أقوم آخد دش وأغير هدومي دي.
  - قوم خد دش علي ما أجهلك الفطار..
- 

تحت الدش ومع صوت ارتطام قطرات الماء بأرضية الحمام..

اهربوا؟

لاتيني؟

طب الكلمة علقت معايا من القصة والي حصل..

اللغة ؟ ده أنا ماعرفش أي حاجة عن اللغة اللاتينية غير أنها لغة من اللغات المُنقرضة..

هو أنا مش هفوق من الكابوس ده بقي؟

كان مالي بكل ده ما كنت في حالي من شغلي لبيتي ومن بيتي لشغلي وكان مكفيني الكام سؤال

الي في دماغي وبرضي رغبتني بكام برنامج وثائقي علي كام كتاب وبحث بقرأهم..

(صوت خبط علي باب الحمام فزع ماجد ونظ من مكانه راسه خبطت في الدش)

- مين؟؟؟؟؟
- الفطار جاهز يا ماجد.
- (بزفير راحة ما بعد المعركة) حاضر يا أمي خارج أهو.
- .. تحب نتكلم حالاً ولا بعد ما تاكل براحتك الأول؟
- ياريت يا أمي بعد الفطار.

قعدوا يفطروا.. نص ساعة تقريباً كل واحد مركز في الي بياكله ماحدش نطق بكلمة..  
وبعد الفطار بدأت هاجر في الإستفسار.. وماجد في الرد..

- أنت حالاً عندك فضول تعرف ولا عندك خوف من الي شوفته ؟
- مش عارف يا أمي بس دي أول مرة في حياتي يحصل معايا كده, أول مرة أكون في حيرة كده..
- أنا نص عمري تقريباً قضيت في البحث والتنقيب والسفر وشوفت فيها حاجات مافيش كلام يقدر يوصفها.. سواء من جمالها أو من بشاعتها..
- مريت بحاجات كتير ووساوس وحقائق..
- أول مرة كانت بالنسبة ليا هي دفعة البداية رغم أنني كنت لسه ماتجوزتش أبوك وكنت في الدراسة..
- خرجنا نعاين مقبرة في وادي الملوك, أول ما قربنا من المكان أصلاً الرعب بدأ يملاني من الي احنا داخلين نشوفه ولا هنقابله جوه المقبرة..
- بس علشان أنا كنت رايحة أدرس مش رايحة سياحة وأتصور صورتين وأرجع..
- دايماً الخوف من المجهول بيكون أكبر من الخوف من المعلوم يا ماجد..
- تعرف أن أبوك الله يرحمه كان دايماً بيقول لي أنت ملبوسة يا هاجر (قالتها بضحكة رقيقة كضحكة الأطفال) وكان بيفطسني من الضحك وهو بيقولها أصلاً.. بس ده من الي كان بيشوفه مني ومن الي كان بيحصل لي..
- الحكاية الي حكيتهالي دي مريت بحاجة قريبة منها لما كنت في المكسيك من كام سنة.. وواحد من السكان الأصليين حكالي أنه كل أول جمعة في الشهر بيطلع في الجبل ويسمع لأصوات بتكلمه وبيكلمها..
- وحكايات زيه كتير سمعتها في مصر وبره مصر.. بس الناس هنا مطحونه ف شغلها ف مش بتشغل دماغها بحاجة ثانية.
- بس مش لدرجة واحد يعيش من غير قلبه وراجل في السبعين من عمره عنده صحة ونشاط الشباب..
- مش لدرجة أنه يقول لي أنه مات وصحي يا أمي!
- أنا نظراتهم وتصرفاتهم والتغير الي حصل فيها في لحظة مش مفارق خيالي ولا عارف أفسره..
- وده الي زارع الخوف جوايا.. دول كانوا هيختفوا يا أمي!!
- علشان دي أول مرة بس يا حبيبي.. لما تتجراً وتواجه وتشيل الخوف من جواك هتبدأ تشوف حاجات ثانية كتير مش شايفها من خوفك..

عقلك هيستوعب المواقف صح مش مجرد خايف منها ومتردد.. ومع الوقت هتبدأ تستمتع بالتجربة.. زي ما احنا استمتعنا بيها!

- احنا؟
- طبعاً هو أنت مفكر أن مافيش غير فتحي ومحسن دول الي مروا بحاجات زي دي.. أبوك وأنا وغيرنا حصل معانا حاجات زي دي وأكبر منها كمان بطبيعة شغلنا..
- أبويا؟
- الله يرحمه.. وعلشان تظمن أكثر.. لو لسه حابب تكمل في تجربتك دي هاجي معاك المرة الجاية نزورهم سوا, إيه رأيك؟
- الله.. بجد يا أمي؟
- طبعاً.. هو أنا عندي كام ماجد.
- ماتحرمش منك يا ست الكل.. خلاص بكره الصبح ننزل ونروح ليهم ماشي؟
- بكره إيه يا دكتووور.. شغلك وشغلي يا حبيبي كفاية ضيعنا يوم من شغلنا ده حاجة وواجبنا وشغلنا حاجة.. يوم الجمعة ننزل سوا.
- لسه هنستني للجمعة (بقمصة طفل مستني لعبته وناقص يدب ف الأرض)
- يومين بس يا مجد.. ماتستعجلش حاجة يا حبيبي.. وأهو تفكر كويس قبل ما تقرر.
- حاضر يا أمي, نستني يومين.

يوم الجمعة .. الساعة ٧ صباحاً.. ماجد خبط علي الباب..

- إصحي يا حاجة ورانا سفر.
- أنت مجنون يا ماجد.. لسه بدري يا حبيبي والناس كمان هيكونوا نايمين
- هنزل أشتري هدية طيب علشان أعتذر ليهم بيها عن الطريقة الي مشيت بيها.
- ماشي.. وصحيني علي الظهر كده نجهز نفسنا ونروح.

نزل ماجد اشترى ليهم جهاز راديو جديد وشوية حلويات وحمص من عند السيد البدوي ورجع البيت واستعد للسفر هو وأمه..

ركبوا العربية واتحركوا في الطريق للاسكندرية..

وصلوا بيت محسن..

- ده البيت يا أمي.
- متأكد ؟
- أيوه يا حاجة مستغربة ليه؟
- البيت ده أبوك حلم بيه زمان..
- وكان مميزه بآنك لو بصيت ليه تحسه مايل مش مستقيم..
- شبابيكه السوداء الي كلها مثلثات متداخله..
- الباب الحديد الي علي كل ضلفة منه رسمة عين وعليها سهم..

نفس الوصف..

- طيب الحلم كان حاجة حلوة ولا وحشة يا أمي..؟
  - ده كان آخر حاجة حلم بيها أبوك.. وآخر كلام دردش معايا بيه قبل ما يعمل الحادثة ويموت.
  - بقولك إيه يا أمي.. تعالي نرجع بيتنا.. مش هيفيدنا بحاجة المشوار ده وأدي البداية موت أهو..
  - تعالي نرجع أنا مش عاوز أعرف حاجة خلاص والأرض بمن عليها والباقي ده كله ديكور ومنظر جمالي.
  - مايبقاش قلبك ضعيف يا واد.. هي مودة ولا أكثر
  - جمد قلبك كده وهات حلوياتك وتعالي نشوف قصتهم إيه هما والبيت بتاعهم ده
- 

مين؟

- أنا ماجد يا عم محسن..
- جاي أعترلك أنت وعم فتحي علي الموقف الي حصل والطريقة الي مشيت بيها وسيبتكم.. ومعايا والدتي.
- خد والدتك وروح يا دكتور.. قصتنا انتهت معاك لما مشيت.
- طيب افتح الباب واسمعنا.
- مابقاش فيه وقت نسمع.. ترجع بلدكم بالسلامة يا ابني.
- افتح الباب يا محسن..
- مين؟
- أنا هاجر عبدالمجيد.
- هاجر!!
- أيوه يا محسن هاجر..
- مرات الغريب؟؟!
- افتح الباب يا محسن مش وقت استغراب.
- ادخلوا.. بسرعة....
- أنتم تعرفوا بعض؟
- أيوه يا ماجد.. مش قولتلك الموضوع كبير.
- ومين الغريب؟ أبويا!!
- أيوه يا دكتور ده الاسم الي كنا بننده لأبوك بيه.. علشان ماحدش كان عارف أصله حتي هو نفسه ماكاتش فاكّر حاجة عن بلده ولا أهله.
- الكلام ده معناه إيه يا أمي!!
- أقعد يا ماجد وهحكليك الموضوع من أوله.. حبيت أحكيلك كل حاجة واحنا هنا علشان تبقي فاهم كل حاجة وتكمل الي بدأناه من عشرين سنة أنا وأبوك.. وكمل معانا فيه عمك محسن وعمك فتحي..
- ... الموضوع بدأ من أول يوم شوفت والدك فيه.. كنت راكبة عربيتي وراجعة أنا وبنات صديقاتي من بره ووالدك كان قاعد علي الطريق في المعرض (منطقة في طنطا) ولاحظت أنه أدامه كتب كتير أوي وعمال يقلب فيهم وهو زهقان وبيقطع صفحات..

شدني أني لاحظت في عينه نور طالع منها لونه أخضر.. وكنا المغرب يعني وقت مافيش انعكاس شمس ولا حاجة..

علشان ماعملش دوشة, رocht البنات ورجعت ليه..

مالقيتهوش قاعد.. رغم الوقت ماعملش خمس دقائق..

روحت وفي حفل التخرج بتاعي لاقيته معانا بيتخرج.. رغم أني ماشوفتوش ف الكلية ولا مرة.. رocht له واتكلمت معاه وقولتله

- أنا شوفتك وأنت قاعد في المعرض علي الطريق بره ومعاك كتب كتير..

- أنا عارف أنك شوفتيني يا أستاذة هاجر.. (وابتسم ابتسامة من جمالها أنا أبتسمت)..

...روحت يومها البيت وتاني يوم لاقيته جاي بيتقدم لي..

أهلي كانوا معجبين جداً بكلامه وطريقته الي دايماً كانت هادية ومريحة للي بيتكلم معاه..

واتعرفنا علي بعض وكنت كل مرة أسأله فيها عن بلده أو أهله أو أي حاجة كان يقول لي هتعرفي كل حاجة ف وقتها..

وبعد الجواز بسنتين بدأت ألاحظ أنه بيسرح كتير وأنا بكلمه ولما يرجع من سرحانه كان بيرد عليا عادي جداً كأنه معايا من أول كلمة..

وكنت بتسغرب.. لحد ما ف يوم نده لي..

- هاجر أنا هقول لك علي سر جه وقت تعرفيه.. علشان أنا مش هكمل كتير في الدنيا!

- ربنا يديك الصحة يا قلبي وتعيش وتفرح بماجد وأحفادك..

- اسمعي بس يا هاجر..

أنا كل الي فاكركه في حياتي هي آخر ٣ سنين بس..

مش فاكرك أي حاجة قبلها..

وكل يوم دماغي بتغيب مني وبشوف حاجات كأنها نبؤات وكلها بتحصل..

شوفتك وانتي راكبة العربية رغم أني ماكنتش مركز غير ف الكتب وقتها..

شوفت حفل التخرج مع أني مش فاكرك أني دخلت الجماعة أصلاً

شوفت خطوبتنا وجوازنا وماجد..

وشوفت نفسي وأنا بموت وازاي هموت..

كل ده مش مهم دلوقتي المهم الكلام الي هقوله ده..

احنا مش عايشين لوحدنا في الكون..

وفيه كائنات بره الأرض متابعانا وبتدخل في حياتنا وتصرفاتنا..

وبيحاولوا يدمروا الأرض بطرق واضحة وطرق خفيه..

الي أعرفه ومتأكد منه أنهم ليهم وسيط هنا.. علي كوكب الأرض..

بيستقبل ويبث ليهم..

بيستقبل إيه وبيبث إيه ده مش قادر أعرفه..

الي شوفته جهاز راديو مع اتنين في الاسكندرية واحد اسمه محسن وواحد اسمه فتحي..

الراديو ده هو أداه بيستخدمها الوسيط ده..

ولازم نوصل للراديو ومن بعدها نوصل للوسيط ولازم نوقفه قبل ما يدمر الأرض..

- انت واعي للكلام الي بتقوله يا توفيق؟

- طبعاً يا هاجر زي مايقول لك..

كل كلمة قولتها واعي ليها, أرجوكي صدقيني.

- أنا مصداقك يا حبيبي بس مش قادرة أستوعب الكلام ده كله..

- .. من بعدها والحياة مرت طبيعية لكam سنة لحد ما ف يوم لاقيت أبوك داخل عليا البيت بينهج..
- هاجر.. أنا نازل الاسكندرية حالاً
- خير يا توفيق فيه إيه؟
- وأنا ف الشغل سرحت تاني وف خيالي سمعت كلمة " اهربوا" ومن بعدها شوفت الراديو وخیال مشوش للوسيط الي كلمتك عنه..
- أنا لازم أنزل الاسكندرية حالاً أشوف نهاية الموضوع ده إيه.. لو الي ف دماغي طلع صح النهاية هتكون قربت أوي يا هاجر..
- هاجر... خلي بالك من ماجد...!!!!
- أنت بتقول إيه يا توفيق أنا مش هسيبك تنزل ورجلي علي رجلك.
- مافيش وقت لأي كلام حالاً, الموضوع أكبر مني ومنك يا هاجر.
- .. خرج من البيت ومارجعتش.. وحصلت الوفاه كان قاعد ف العربية عادي خالص والطب الشرعي قال سبب الوفاة توقف مفاجئ لعضلة القلب.

.. وبعدها بكam شهر علي ما فوقت من الصدمة قررت أكمل الي قاله ونزلت هنا لعمك محسن وعمك فتحي علشان أعرف إيه الحكاية..

وحكيت ليهم الي حصل كله.. بس ماحدش فيهم كان لسه وصل حاجة وانقطعت الاتصالات بيننا وانشغلت بيبك وبشغلي لحد ما حصل الي حصل وقولتلي وشوفتك وأنت بتقول نفس كلمة أبوك.. ولما قولتلي علي موضوع عمك فتحي وقلبه الي مش شغال ده كان لازم آجي معاك..

- يعني الموضوع كله مربوط ببعضه؟
- مش قولتلك يا ابني الحياة أكبر من مجرد أحلام وأسئلة!

- وإيه الي فكرك بينا يا أستاذة هاجر؟
- خايفة علي ابني يا عم محسن..وفين الحاج فتحي؟
- فتحي ف المحل منتظر أي جديد في الراديو.
- لسه معاكم الراديو؟
- أيوه هيروح فين يعني, احنا هنموت أهو وهو لسه زي ماهو.
- بس الموضوع تطور دلوقتي وبقينا بنسمع حاجات تانيه..
- حاجات تانيه ازاي؟
- تعالوا معايا نروح لفتحي المحل وانتم تفهموا.
- فتحي.. جبتلك معايا مفاجأة..
- مين!! أستاذة هاجر!! ياميت أهلا وسهلاً..

- أهلا ببيك يا عم فتحي.. وحشتوني والله.
- هو انتي تعرفي الدكتور؟
- ده ابني يا عم فتحي.. ماجد يبقي ابني..
- ماجد ابن توفيق؟؟!
- الدنيا صغيرة يا عم فتحي.
- شوفتي احنا العواجيز المكحكين وصلنا لإيه وانتي لآ؟!
- إيه ده؟
- ده يا ستي جهاز تقوية إرسال اخترعته علشان نعرف نسمع كويس الي بيتقال في الراديو..
- الدكتور كان معانا وكنا عاوزينه يسمع الي بيتقال يمكن يساعدنا بس للأسف خذلنا ومش.
- أنا آسف والله يا عم فتحي بس كنت خايف.. أعذرن.
- ولا يهمك يا دكتور مقدرين ده.
- المهم يا عم فتحي فيه جديد في الموضوع وصلتم لحاجة بخصوص الوسيط أو أي معلومة جديدة؟
- حاجات مش حاجة واحدة..
- الوسيط ده يا ستي عبارة عن أداة موجودة هنا علي الأرض في مكان ما ماقدرتش أحده
- مهمتها أنها تستقبل إشارات ومحادثات من مكان خارج الأرض وتبث معلومات برده من الأرض
- عن الابتكارات والتطور النووي والأسلحة الحربية علي الأرض..
- و "اهربوا" الي كنا بنسمعها دي كانت جزء من رسالتين واحدة بتقول " اهربوا من الأرض لأي
- مكان آخر, سيتم تدمير الكوكب" والثانية الي محسن سمعها زمان "إنهم قادمون.. بلا رحمة..
- اهربوا"!!
- وقتها كنا مرعوبين أنا ومحسن من الرسائل..
- لحد ما سمعنا من أسبوع رسالة ثالثة بتقول "حافظوا علي الأرض, لن تجدوا لها بديل" ووقتها
- خمننا ان الرسائل دي بتقول ان احنا الي هندمر الكوكب بنفسنا مش حد الي هيدمره من خارج
- الكوكب..
- بس ده مجرد احتمال يا عم فتحي؟
- أكيد يا أستاذة هاجر.. صدقيني.
- محسن حط إيده علي كتف هاجر وهمس في ودنها
- تعالى يا بنتي عاوزك في كلمتين..
- خير يا عم محسن..
- فيه حاجة أنا شاكك فيها.. ومش عارف صح ولا غلط
- بس مش هينفع أقولها أدام فتحي وماجد..
- ليه؟؟!
- هقولك بعدين.. روحوا دلوقتي وبعد يومين لما الدنيا تهدي تعالى لوحذك وماتعرفيش ماجد.
- حاضر!!

وبعد يومين رجعت هاجر لمحسن البيت..

- مين؟
- أنا هاجر يا عم محسن.
- لوحذك؟
- أيوه.
- أدخلني يا بنتي.. متأكده أن مافيش حد معاكى أو جاي وراكي؟
- متأكدة يا عم محسن ماتقلقنيش!
- خير.. أديني جيت زي ما قولتلي..
- الكلام الي هقوله ده شك عندي ومش عارف حقيقة ولا لا وأنت الي هتأكيده..
- أنا شاكك أن ماجد وفتحي فيهم حاجة غلط..
- موضوع أن فتحي عايش وقلبه مش شغال دي ماعداش مني وفضلت متابعة من يومها..
- ولاحظت حاجة ف ماجد لاحظتها بردو ف فتحي..
- أنت بتقول إيه؟ ماجد ابني؟!!
- أيوه ابنك.. ركزي معايا يا هاجر
- توفيق زوجك ما ماتش علشان كان بيدور علي الحقيقة..
- توفيق كان واحد منهم..
- ودوره كان انتهى..
- تقرير الطب الشرعي قال أن سبب الوفاة توقف عضلة القلب.. هي ماكانتش شغاله أصلاً!
- فتحي جسمه مافيهوش أي حرارة.. طول الوقت جسمه بارد..
- وأكد عارفه يعني إيه الجسم يكون بارد طول الوقت مهما كان الجو حر
- ماينزلش منه نقطة عرق واحدة..
- وده الي لاحظته في ماجد من سلامه عليا بردو..

(سكوت بنظرة من الصدمة والذهول)

- مش لاقيه كلام أقوله..
- يعني ابني مش ابني؟!!
- يعني ابني مات؟!!
- أنت مجنون..
- أكيد مجنون..
- وأنا غلطت أني جيت أتكلم معاك وأسمع التخاريف دي.
- خرجت في حالة من الهلع ورزعت الباب وراها..
- وفي الطريق بدأ التفكير يتغلغل في مخها..

لو محسن كلامه صح..

هتصرف ازاي؟

ابني راح فين؟ وامتي ده حصل؟

هواجهه ازاي؟ هقول له إيه؟

هيكون رده إيه؟



هل لو عرفوا أنني عرفت هياخدوا مني ابني زي ما خدوا أبوه؟  
لازم أتصرف بهدوء.. لحد ما أتأكد من كلام محسن..

- ماجد أنت ف البيت؟
  - أيوه يا أمي أنا ف أوضتي..
  - أنت كنتي فين؟
  - تعالى شوفي لاقيت إيه في ورق أبويا..
  - ورقة كاتب فيها " إنهم كثيرون, وأنا منهم!"
  - فاهمه حاجة منها؟
  - لأ مش فاهمه حاجة.. تعالى في الصالون بره عاوزاك.
  - مالك يا أمي؟!
  - تعالى بس نقعد بره شويه عاوزه أقول لك علي حاجة.
  - حاضر..
  - عاوزة أخدمك وننزل بكره نعمل فحص كامل ليا وليك يا ماجد.
  - فحص ازاي يعني؟
  - فحص كامل يا ماجد.. نعمل صورة دم ووظائف جسم!
  - ليه يا أمي فيه حاجة؟
  - حاسة أنني تعبانة ولما روت للدكتور قال لي أنني لازم أعمل فحص كامل وخايفة ليكون الي عندي مرض انتقل ليك مع الولادة.
  - سلامتك يا غالية بس تعبانه حاسة بيايه؟
  - هقولك لما نعمل الفحوصات بكره.
  - الي شافاه يا أمي, حاضر.
- ( بالفعل تاني يوم راحوا المستشفى وعملوا فحص كامل للجسم وأشعة علي أجهزة الجسم.. وكانت هاجر مفهومة دكتور القلب علي أن مايقولش أي حاجة أدام ماجد, الي طلع قلبه مش شغال! )
- ها يا أمي التحاليل والفحوصات فين علشان أشوفها.
  - لسه مظهرتش, بس الدكاترة قالوا كل حاجة كويسة.
  - بس شكلك بيقول غير كده, والدموع الي ف عينيكي دي مش بتقول أن كل حاجة كويسة.
  - لأ يا حبيبي هو مافيش حاجة بس دموعي علشان كنت خايفة عليك.. يلا نرجع البيت.
  - مش هنروح لعم محسن وعم فتحي تاني؟
  - عاوز أشوفهم وصلوا لجديد ولا لأ وأعرفهم الورقة الي والدي كان كاتبها.
  - هنروح بس مش دلوقتي..
  - نركز في شغلنا الي أهملناه ده وأسبوع ولا حاجة ونروح ليهم تاني..
  - يلا نروح علشان أنا حاسة بالإجهاد وعاوزه أرتاح..
  - حاضر.

(تاني يوم الصبح خرجت هاجر بعربيتها ونزلت لمحسن بدون تفكير أو تردد)

- مين؟
- أنا هاجر يا محسن إفتح الباب.
- وماحدث معايا ولا ورايا إفتح الباب!
- أدخلني يا هاجر.. حد بيجري وراكي يا بنتي؟
- بتنهجي كده ليه؟
- طيب ماتتكلميش بس أقعدي وهجيبلك حاجة تبلي ريقك بيها.
- مش عاوزة حاجة.. أنا منهارة يا عم محسن كلامك طلع صح يا عم محسن.. ابني مش ابني.....
- ( ودخلت في نوبة من البكاء الشديد لدرجة أن آهاتها بدأت تقلق محسن أن الناس تسمعها )
- اهدي يا بنتي بس وكل حاجة وليها حل..
- اهدي علشان نفكر صح ونشوف هنعمل إيه.
- مش قادرة أستوعب أن كل ده حصل وأنا مش واخده بالي..
- الدنيا خدنتي وانشغلت بشغلي لدرجة أن ابني ماعرفش عايش ولا ميت!
- يا ريتني مت قبل اليوم ده الي أشوف ابني فيه ميت أدامي وبيتحرك عادي زي الزومبي.
- احنا مانعرفش حاجة لسه أكيدة يا هاجر يا بنتي..
- احنا لسه بنتحسس الطريق وبنحاول نفهم..
- يمكن فتحي وماجد لسه موجودين واحنا الي مش عارفين الحقيقة فين مش أكثر!
- علشان كده بقولك لازم نهدي ونفكر.. مش هنوصل لحاجة وأنت كده!
- ماجد لقي امبارح ورقة في حاجات والده كاتب فيها "إنهم كثيرون وأنا واحد منهم"
- تفتكر دي بتأكد كلامك يا عم محسن؟
- من كلامك عن توفيق والطريقة الي قابلتيه واتعرفتي عليه بيها بنسبة كبيرة ممكن يكون ده قصده.. وممكن جداً يكون قاصد الناس الي احتكت بالموضوع وعاصروه.
- يعني فيه أمل؟
- يا بنتي كل شئ جايز ولاكن احنا لازم نفكر بشكل أوسع مش لتوفيق ولا فتحي ولا حتي ماجد.
- احنا لازم نفكر في الصورة الأكبر علشانهم وعلشان كل الناس مايحصلش معاهم الي حصل معانا.
- عاوزني أعمل إيه دلوقتي يا عم محسن؟
- أول حاجة عاوزك تجيبي الورق وأي حاجة تخص توفيق..
- وماتحسسيش ماجد بأي تغيير.. ويستحسن لو تقولي له أنك مسافرة في أي مكان ..
- علشان عارف أنك مش هتقدري تخبي جواكي وهيبان عليكي ووقتها الوضع ممكن يكون خطر عليكي وعليه, كل شئ في هدوء كده وتعالني أقعدي في شقتكم هنا في الإسكندرية لحد ما نشوف آخرها إيه..
- وأنا هدور في شوية حاجات تخص فتحي عندي هنا في اليومين الي قعدهم معايا وبردو هحاول أروح شقته أدور فيها علي أي حاجة تفيدنا بشكل مؤقت..
- وعاوزين نروح المحل.. أكيد فيه حاجة هناك هتفيدنا والجهاز الي عمله ده والراديو..
- المحل هيبقي صعب لأن فتحي يعتبر مقيم فيه, بس هنشوفلها حل بردو وندخل..
- المهم زي ما قولتلك يا هاجر.. بهدوء ومن غير أي إنفعال.
- هحاول...

رجعت هاجر للبيت وكان ماجد في شغله.. دخلت مكتب توفيق الي مجمعة فيه كل حاجة تخصه في كراتين.. بس المكتب كان مقلوب وتقريباً كل الكراتين اتفتحت ومرميه علي الأرض.. مكانش فيه أدامها غير أنها تدور فيهم يمكن تلاقي حاجة, مع أنها كده عرفت أن الي بتدور عليه حد سبقها ليه.. قعدت تدور لوقت ما رجع ماجد من الشغل..

- ماجد أنت جيت؟
- أيوه يا أمي.
- تعالى كده مكتب والدك.
- أنت الي قلبت المكتب كده؟
- لأ يا أمي أكيد مش أنا.
- آمال مين الي قلب الدنيا كده ورمي كل حاجة علي الأرض؟
- صدقيني يا أمي أنا ماعرفش حاجة.. لازم نبليج البوليس, أكيد فيه حاجات اتسرقت.
- لأ مش لازم بوليس.. الكاميرات موجوده وسجلت كل حاجة.. وهيبان مين كان هنا.
- كاميرات؟ هو أنت حاطة كاميرات في البيت يا أمي؟
- في الأوضة دي بس.. مركباها من سنة, كنت حاسة أن فيه حاجة غلط هتحصل.
- طيب ما ده كويس.. يلا بسرعة نفرغ الكاميرات ونشوف مين الي قلبه جابه يدخل البيت ويعمل كده..
- لأ.. إطلع أنت غير هدومك وخذ دش علي ما أشوفها.
- أنت بتقولي إيه يا أمي.. معاملتك معايا متغيرة بقالها كام يوم.. هو أنا زعلتك في حاجة؟
- لأ يا ماجد مازعلتنيش في حاجة بس اسمع الكلام الي بقوله دلوقتي.
- حاضر يا أمي.. هأخذ دش وأنزل.

كانت مركبة كاميرات مراقبة فعلاً في زوايا خفية في الأوضة علشان ماحدش يلاحظ وجودها. بمجرد ما خرج ماجد من الأوضة بدأت تراجع الكاميرات.. لآكن الموضوع كان فيه حاجة مش منطقية..

باب الأوضة اتفتح لآكن الي دخل ماكانش ماجد.. ده كان شاب تاني في الثلاثينيات من عمره.. شافته قبل كده لآكن مش عارفه فين... بس ملامحه مميزة, لآكن مش فاكده مين وشافته فين.. دخل الأوضة وفعلاً قلبها كلها ولاكنه واضح أنه مالقاش فيها الي بيدور عليه ف خرج.

- ها يا أمي, لآقيتي لإيه؟
- للأسف الكاميرات ماسجلتش حاجة, شكلها فيها مشكلة ومش بتسجل.
- طب والعمل إيه دلوقت, أتصل بالبوليس؟
- لأ أنا هتصرف.

في الوقت الي كان ماجد فيه فوق قصت الفيديو علي فلاشة وخرجت بيه ونزلت ركبت عربيتها واتحركت الأسكندرية لمحسن..

- الشخص ده أنا شوفته قبل كده؟
- شوفتيه فين؟
- مش عارفه بس أنا متأكده أنني شوفته!
- بس ماقولتليش أنك مركبة كاميرات مراقبة في الأوضة يعني قبل كده؟
- ماكنتش مركزة فيها أصلاً وماكنتش عارفه أنني هحتاجها في يوم من الأيام.
- يعني مش فاكده الشخص ده خالص؟
- قولتك لا يا عم محسن!
- طيب كويس...
- كويس؟!!!!
- (بصوت متردد) أقصد يعني كويس أنك مركبة الكاميرات دي, المهم لاقيتي حاجة؟
- أنا جبت كل الورق زي ماقولتلي, مكانش فيا دماغ أدور من الربة الي حصلت دي.
- طيب سيبييلي الورق وأنا هدور فيه ولو لاقيت حاجة هتصل بيكي.
- طب ما أدور معاك؟ نختصر الوقت والمجهود!
- لأ روجي أنتي البيت علشان ماجد مايلاحظش غيابك, زي ما قولتك مش عاوزين حد يلاحظ حاجة.
- (لحظة من الشك والدهشة) حاضر, بس لو وصلت لأي حاجة كلمني يا عم محسن.
- ماتقلقيش..

ركبت العربية وهي في طريق الرجوع بدأت تفكر في الي حصل.. ضغط الأحداث الكثيرة الي ورا بعضها دي..

فيه حاجة غلط بتحصل..

فيه حلقة مفقودة في النص..

الموضوع محتاج يتعاد التفكير فيه من زوايا ثانية..

توفيق.. فتحي.. ماجد... محسن!!

فيه حاجة بينهم الأربعة مش مضبوطة.. مش هينفع أفضل ماشية كده الأحداث بتسرقتني وتشدي وأنا مش فاهمه حاجة..

لازم أفكر في هدوء ولوحدتي..

وكويس أنني صورت الورق كله!!

أرجع وأدور فيه من ثاني في هدوء لوحدتي.

---

- أمي أنت صاحبة؟

- أيوه يا ماجد.

- مال وشك باين عليه الإرهاق ليه كده؟

- مافيش يا حبيبي اللي حصل بس الفترة الي فاتت دي مآثر عليا شوية.
- بقولك يا ماجد..
- أأمريني يا أمي.
- عاوزين ننزل بكرة نروح مستشفى تانية نعمل فحوصات..
- فحوصات تاني يا أمي؟
- بمناسبة الفحوصات هو نتيجة الفحوصات الي عملناها ظهرت؟
- ما هو علشان كده بقولك محتاجين نعمل تاني في مكان تاني.
- هو فيه حاجة ظهرت فيهم؟!
- لأ مافيش حاجة بس حاسة أنني تعبانة والفحوصات الي ظهرت بتقول مافيش حاجة.
- طب ما ده حاجة كويسة.. ليه القلق طيب يا غالية؟
- ماجد.. أنا مافيش فيا حيل للمناودة.. عاوزين ننزل نعمل فحوصات جديدة بكرة وخلص.
- طيب هو أنا ليه أعمل أنا كمان؟ هو فيه حاجة فيا؟
- لأ يا ضنايا مافيش حاجة, بس علشان قلبي يتطمئن.
- حاضر يا أمي الي تشوفيه!

بالفعل تاني يوم نزلوا مستشفى تانيه.. هاجر سبقتة للمستشفى واتفقت مع المستشفى علي كل شئ وأن ماحدش يوضح حاجة لماغد..

وبعد فحوصات روتينية و PCR وشوية تحاليل..

- خير يا دكتور؟
- ابن حضرتك مافيهوش أي حاجة.. وقلبه سليم مافيهوش أي مشكلة تقلقي منها حضرتك.
- إزاي؟ احنا عاملين فحوصات والدكتور قال لي أن قلبه مش شغال!
- حضرتك ده كلام غير علمي والدكتور أو الشخص الي قال لحضرتك الكلام ده شكله مايعرفش حاجة عن الطب.. قلب الدكتور ماجد سليم ومافيش فيه أي مشكله وكل وظائفه بيؤديها بكامل كفاءته.
- ريحتي.. ماتعرفش كلامك ده ريحني وريح قلبي إزاي يا دكتور.. متشكرة جداً لحضرتك.

مجرد ما شافت ماجد جريت عليه وأخذته ف حضنها وضمته ضمه طفلها التايه من سنين

- فيه إيه يا أمي؟
- مافيش يا نور عيني.. يلا بينا ع البيت
- فيه كلام كتير أوي عاوزة أقولها لك.. يلا بسرعه..
- طيب وباقي الفحوصات؟!
- فحوصات إيه بس يلا علي البيت بسرررعه (وشدته من إيدته لدرجة أنه اختل توازنه وكان هيقع منها)

ومع وصولهم البيت كانت حكت ليه الي حصل كله.. وكلام محسن ليها والدكتور الي قال لها أن إبنك قلبه مش شغال.. وسرقة مكتب والده والإتفاق بينها وبين محسن.

- كل ده حصل؟
- أيوه.. ولولا شكي في الكلام الي قاله ليا محسن وصده ليا وكأنه أخذ الي عاوزه مني خلاص لما ودبت ليه الورق ماكنتش عارفه إيه كان ممكن يحصل.
- طيب أرجوكي يا أمي بس ارتاحي شوية, باين عليك التعب وأنا مش هستحمل يحصل ليكي حاجة.. علشان خاطري بس اطلعي ارتاحي شوية.. ولما تصحي تفكر ونشوف هنعمل إيه.
- حاضر يا ضنايا, أنا فعلاً هموت وأنام.
- وأنا هقعد أدور في الورق ده علي ما تصحي وأشوف يمكن فيه حاجة تفيدنا.
- تمام.

وبعد مرور سبع ساعات..

- ها يا ماجد.. لاقيت حاجة مهمة؟
- والله يا أمي فيه حاجات ف الورق.. وحاجات فكرت فيها.
- زي؟
- يعني بره الورق أنا فكرت ف كلامك الي قولتيه وتصرفات محسن معاكي لاقيت أنه بشكل أو بآخر هو الطرف الشرير في الحكاية..
- حكايته عن فتحي وقلبه الي مش شغال ده هو كمان ممكن تكون صح أو غلط زي ما حصل معايا..
- الدكتور الي قال لك عني أول مرة أكيد فيه صلح بينه وبين محسن..
- رفضه أنه يشركك معاه في الموضوع وكمان كل ما نروحله يقول لنا فتحي مش موجود ومرة واحدة الي قابلت فيها فتحي في المحل بتاعه كان باين أوي أنه مشنت وهو بيتكلم وعنده هوس مريب بالراديو..
- مانعرفش محسن عمل أو بيعمل إيه معاه هناك..

لاكن جوه ورق والدي مالقيتش حاجات واضحة.. بس فيه إشارات وكلمات مش مفهومة..  
يعني فيه ورقة لاقيت مكتوب فيها  
"أنا مش فاهم حاجة من الي بيحصل معايا"  
"يا تري شكوكي في محلها ولا بظلم ناس بريئة"  
"لازم أخلص بسرعة وأرجع"  
"الأيام بتفوت وهتكشف كده قبل ما أوصل ليهم"

- والمشكلة أن كل الجمل دي في فواصل كبيرة بينهم فاضيه في الورقة..
- شاكك أن ممكن يكون فيه حاجة مكتوبة في الفراغات دي.. حاولت بكشاف الموبايل وباقلم الرصاص أكتشف حاجة مكتوبة مالفيتش حاجة.
- جربت بكشاف الأشعة فوق البنفسجية؟
  - UV ؟ للدرجة دي؟!
  - قوم هات الكشاف بس كده وجرب.
  - للأسف بردو مافيش حاجة.
  - طيب مش مهم دي حالاً نرجع لها بعدين.. لاقيت حاجة ثانية؟
  - لأ.. مافيش حاجة ثانية تتفهم..
  - أنا كمان نزلت المتشفي وسألت عن الدكتور الي عمل لي الفحوصات أول مرة.. مش موجود في المستشفى.. وماحدث يعرف عنه حاجة!
  - كده يبقى الحل عند محسن وفتحي.
  - الحل عند فتحي.. هو الي ماخذناش وقتنا معاه ومحسن دايماً كان بيتجنب أننا نقعد مع فتحي لوحدها..
  - شايف أننا ننزل ليه؟
  - يلا بينا.. حالاً.
- 

وصلوا الإسكندرية.. وراحوا لفتحي المحل..

- (هاجر بصوت خافت) فتحي؟ أنت هنا؟ احنا لاقينا الباب مفتوح ف دخلنا.
- مين؟
- أنا هاجر.. ومعايا ابني ماجد.
- تعالوا
- شوفت محسن أو اتكلمت معاه الكام يوم الي فاتوا؟
- ليه؟
- مش حاسس بحاجة غريبه منه أو فيه؟
- محسن صاحبي مات من سنين يا هاجر..
- الي موجود ده مش صاحبي.. أنا مش بحاول أبين ليه حاجة لحد ما أوصل للسبب في الي هو فيه ده والتغيير الغير طبيعي الي شايفه منه.
- يعني أنت ملاحظ التغيير الي هو فيه؟
- طبعاً من سنين.
- خوفي مانعني من أني أواجهه أو أتكلم معاه وأبين ليه.
- طيب أنت تعرف حاجة عن الراديو الي معاه؟
- حكايات أبويا بس الي أعرفها..
- أن الراديو ده مافرطش فيه لحد وأنه طلب مني أنه لو حصل ليه حاجة أكسره وماسييش حتة فيه سليمه.. لآكن يوم ما والدي مات محسن أخده مني وقال أنه هيكسره وماحصلش ده.. ومن يومها وهو غريب عني.
- ثواني بس.. يعني مش أنت الي هاديتة بيه؟

- لا هو الي أخده ومن غير حتي ما يستأذني.. وأنا ماحبيتش أخسر صاحب عمري علشان حاجة زي دي.. ماكنتش أعرف أنه حاجة ممكن تتسبب في ناس تموت.
- يعني عارف أن الراديو ده مش مجرد راديو عادي؟
- أيوه.. أبويا قبل ما يموت اداني جواب وقال لي مافتحهوش غير بعد موته, وكان فيه أن الراديو ده جهاز اتصال بين حد هنا ف الأرض ومخلوقات في مكان تاني
- فاكتر إسم الدكتور الي كشف عليك أول مرة لما أغمي عليك؟
- كان إسمه غانم أو غنام.. حاجة زي كده, بس ده ساب البيت من سنين كتير.
- ...غانم... مش بيفكرك بحاجة الإسم ده يا عم فتحي؟
- لا!
- غانم علي.. افكرته؟
- مين غانم علي ده يا هاجر؟... غانم!!!! نائب المحافظ!؟
- أيوه هو الي كان ساكن معاكم في البيت لما كان لسه موظف في المحليات
- الي اتخانق مع توفيق لما جينا ليكم أول يوم بحجة أنه خبط فيه وهو طالع علي السلم.
- إيه ده.. أنا ازاى ماركزتش ف إسمه لما محسن قال لي أنه كشف عليا؟!!
- يعني محسن كان مرتب مع كل الدكاترة الي روحناهم؟
- فاكتر يا ماجد لما كنت عندنا وكنت بحكيلك وقولتك أن محسن هو كمان.. وقاطعني وقال لي ماتكلمش في النقطة دي؟
- أيوه فاكتر يا عم فتحي وكان وشه مقلوب وقتها ومتضايق جداً.
- وقتها كنت هقول لك أن عمك محسن هو كمان نفس الوضع, بس ماعرفش ليه ماكنش بيحب أننا نتكلم عنه رغم أنه كام بيتكلم معايا كتير عني!
- يعني محسن كمان قلبه مش شغال؟
- أيوه يا هاجر.. بس كان مشدد عليا أن لو اتكلمت في الموضوع ده هيقطع علاقته بيا.
- كده محسن وغانم بينهم حاجة مش هيحلها غير غانم.. خصوصاً أنه هيخاف علي اسمه
- وسمعتة.. لازم نروحله الوزارة ونتكلم معاه.
- تفتكري هنعرف نوصل ليه؟
- لازم نوصل ليه.. لازم.
- خلاص, أقعدوا اليومين دول في شقتكم هنا لحد ما أشوف حد يقدر يخلينا نقابله.
- تمام, أهو نرتاح شوية وهدور بردو في الشقة يمكن توفيق ساب حاجة في الشقة تفيدنا.. يلا يا ماجد.
- خذ بالك علي نفسك يا عم فتحي ولو فيه أي حاجة كلمنا.
- وأنتم كمان يا بنتي.

صباح اليوم التالي.. التليفون بيرن في محل فتحي..

- صباح الخير.
- فتحي ازيك.. أخبارك إيه يا صاحبي؟
- كويس يا محسن.
- مال صوتك؟ حد مزعلك؟ تعبنا؟
- لأ كله حاجة تمام.
- صوتك متغير يا صاحبي.. مالك؟



- مافيش حاجة يا محسن, مصدع بس شوية.
- مش بتسأل عني يعني ولا بتيجي البيت.. هو أنا زعلتك في حاجة؟
- لأ مافيش حاجة قولتلك.
- طيب أنا هجيب فطار وأجيلك نفطر سوا..
- لأ ماتجيش.. أنا فطرت خلاص ومش جعان.
- فتحي أسلوبك مش مطمئي..
- سلام يا محسن دلوقت.

.....

- بعد ما قفل السكة , اتصل بهاجر..
- أيوه يا هاجر.
- صباح الخير يا عم فتحي, عامل إيه؟
- أنا كويس وأنتم عاملين إيه؟
- احنا بخير.. فيه جديد؟
- لأ مافيش, بس محسن كلمني دلوقتي ولسه قافل معاه..
- مش عارف أتعامل معاه طبيعي يا هاجر وخايف يشك في حاجة!
- لأ ماتقلقش من النقطة دي أنت بس اتعامل عادي خالص وماتقولش ليه حاجة لحد ما نوصل لغانم الأول.
- هحاول حاضر, وأنتم من ناحيتكم فيه جديد؟
- لسه والله يا عم فتحي, ماجد من امبارح في مكتب والده ماخرجش منه ويبدور فيه.. لو فيه أي جديد هعرفك علطول.
- تمام.

.....

- ماما..
- أيوه يا ماجد جايه لك.
- ها يا حبيبي, فيه إيه؟
- شوفي الورقة دي كده!
- دي أرقام تليفونات.. بس الي جنبها دي حروف.
- أيوه بصي كده لثالث رقم!
- غ.ع ... غانم علي؟!!!!
- مش عارف.. بس ده الي فكرت فيه أول ما شوفت الأرقام!
- ٣٥ رقم! تفتكر الناس دي كلها معانا في نفس الدائرة دي؟
- مش عارف يا أمي بسايله الي يخلي والدي يكتب أساميه حروف إلا لو كان علوزهم مبهمين مايعرفهومش غيره؟
- هممم طيب هنكلمه بس نكمل تدوير في الحاجة يمكن نلاقي حاجة تانيه, نخلي الإتصال بيه آخر حاجة نعملها.

وبعد ساعتين من البحث دول الوصول لنتيجة.. أصبح الإتصال هو الاختيار الوحيد -

- هات الرقم يا ماجد, نتصل بيه ونشوف هو فعلاً غانم ولا لا.

جرس..

- ألو.
- ألو, مساء الخير.
- أمري حضرتك, مين معايا؟
- (بقليل من التردد) أستاذ غانم علي معايا؟
- أنت مين وجبتي الرقم ده منين؟
- (مزيد من التردد) معاك هاجر عبدالمجيد.. (وقبل ما تفكر هتقول إيه بعدها كانت السكة اتقفلت في وشها)

- ها يا أمي حصل إيه؟
- قفل السكة أول ما قولت إسمي!
- مالهاش معني تاني !!! أكيد هو!
- هجرب أتصل تاني..
- مش بيرد..
- أتصل من معايا طيب؟
- جرب كده..
- بردو مش بيرد.
- (بعد وقت مش قليل من الصمت بينهم الإثنين كسر الصمت باب الشقة بيخبط.. )
- قام ماجد فتح الباب..

- مساء الخير
- مساء الخير
- أستاذة هاجر موجودة؟
- أيوه موجودة, مين حضرتك؟
- قول لها من طرف نائب المحافظ.
- أستاذ غانم؟!!!
- أيوه.. لو سمحت عاوز اتكلم معاها.
- حاضر ثواني .. ( أمي.. فيه حد عاوزك )
- أستاذة هاجر.. هستأذنك تيجي معايا, معالي نائب المحافظ طالب حضورك علي وجه السرعة.
- دقيقتين أغير هدومي وهاجي معاك.
- تروحي فين يا أمي؟ مش هسيبك تنزلي.
- ده الي كنا عاوزينه يا ماجد من الأول.. وأهو جالنا لحد عندنا.. ماتخافش عليا!
- خلاص هاجي معاكي.. رجلي علي رجلك.

- ماشي.
- ( نزلوا من البيت, ركبوا العربية )
- حضرتك ده مش طريق المحافظة!
- الباشا هيقابلكم في مكان تاني.
- فين يعني؟!
- ماتخافيش أستاذة هاجر مش خاطفينكم.. ( بابتسامة لا تحمل أي معنى )
- (خرجت السيارة لطريق مصر الإسكندرية الصحراوي وفي منتصف الطريق وقفت)
- اتفضلوا انزلوا.
- ننزل فين احنا في صحراء؟!
- فيه عربية تانية هتركبوها.
- ( خرجا من السيارة ونظرا حولهما.. لا شئ إلا الرمال وطريق مهجور من الحركة وفجأة ظهرت سيارة أخرى ووقفت أمامهما, فتح الزجاج المُعتم )
- اركبي يا أستاذة هاجر.. وأنت كمان يا ماجد.
- ( بلا أسئلة ركبا السيارة )
- أنا غانم علي..
- غني عن التعريف أستاذ غانم.
- أكيد بما أنك كلمتيني علي رقمي الشخصي فأنت مش عاوزة تعرفي غانم نائب المحافظ.. أنت كلمتي غانم المجهول.. الي مش غني عن التعريف!
- بالظبط كده..
- طيب أنا مش هطول عليكم وهختصر في الكلام علشان مافيش أمان للوقت..
- أنا وتوفيق جوزك وغيرنا مجموعة من الرجال والنساء مرينا بتجربة فريدة من نوعها, وكان فيه بيننا أكواد وشفرات ولقاءات حاولنا علي أد ما نقدر نخليها في السر.. وكان توفيق جوزك مسمينا ( جماعة القلب الميت ) كنوع من الدعاية علي التغيير الي حصل في حياتنا.. وبما أنك وصلتني ليا ف أكيد عرفتني الي حصل مع محسن وفتحي.. اتأخرتي كتير أنت وماجد.. بس المهم أنكم وصلتكم.
- أنت كنت عارف أننا بندور؟
- أنتم متراقبين من المجموعة من يوم وفاة توفيق الله يرحمه.. منها خوف عليكم أن يحصل ليكم حاجة وبردو أمان للمجموعة أن تتصرفوا تصرف غلط يضيع مجهود سنين وفقداننا للناس غاليين علينا.
- مش فاهمه!
- المجموعة بتاعتنا دي فيه عامل مشترك بيننا أننا بنقدر نتواصل مع بعض في وقت النوم.. وكلنا مرتبطين بشكل أو بآخر مع حاجة مجهولة من وقت للتاني بتتدخل معنا في المنام وتبلغنا بأخطار بتواجهنا علي كوكب الأرض.. منها حاجات احنا اتعاملنا معاها بالفعل وأبطلناها قبل ما تتسبب في دمار لبلاد ومنها حاجات ماقدرناش عليها وتسببت في أذي للناس.
- ممكن توضح أكثر؟ يعني أنتم بقيتوا أبطال خارقون يعني؟
- (بضحكة ثقة وتواضع) مش بالظبط كده.. بس احنا من التجارب الي مرينا بيها والتهديدات الي تصدينا ليها بنفتخر بنفسنا.

- أنتم مين؟
- احنا كتير.. ومش في مصر بس.. في كل مكان في العالم.. جهاز الراديو الي مع محسن ده لما بيكون قريب من حد بيأثر عليه وبيخليه يوصل ويتعلم حاجات تاخذ سنين في التعليم في ثواني من غير ما يُدرك ده.. زي ما حصل معاك يا ماجد لما روحت لمحسن!
- إيه ده أنت عرفت منين؟
- مش قولتلك في وقت النوم بنتواصل!! اللغة اللاتينية الليث اتكلمت بيها وأنت نايم دي كانت تأثير تعرضك للجهاز.. الموضوع أكبر من مجرد جهاز أو تهديدات.. الموضوع مرتبط بكيانات علي الأرض وبره الأرض..
- لأكثر من ٣٠ سنة معانا علماء ورواد فضاء ودكاترة في كل مكان بنحاول نوصل لحل ونوصل لأصل الشر والخير الي بنتعامل معاهم دول.. بدل ما نكون مجرد مستقبلين وبننفذ الي بنشوفه وخلاص.. ولسه بردو الموضوع مجهول بالنسبة لينا وكل ما بنوصل لحاجة نكتشف غموض أكبر.
- كل المطلوب منكم دلوقت أنكم تروحوا البيت.. تعيشوا حياتكم الطبيعية.. وأي ورق ومستندات ومتعلقات تخص توفيق احرقوها.. فيه حاجات لو وصلت للإيد الغلط ممكن تكون سبب إبادة للكوكب وكل الناس عليه!
- طب أنا عاوز أعرف حاجات كتير.. وعاوز أكون معاكم أحاول أساعدكم يمكن أقدر أفيدكم.
- دورك لسه ماجاش يا ماجد.. لما يجي دورك صدقتي هتلاقي نفسك معانا من غير طلب.. المهم دلوقت تاخذ بالك من نفسك ومن والدتك وتعملوا الي قولتلكم عليه.
- هتتزلوا من العربية وتركبوا العربية الي جابتكم هنا.. تروحوا لفتحي وتفهموه أن محسن مكانش قاصد يضره.. محسن صاحبه وببحبه زي ماهو.. وتفهموه أنه مايتكلمش عن الموضوع مع حد لحد ما دوره يجي هو كمان..
- لسه ماجاش الوقت الي تسألوا فيه... مين هناك.

( النهاية.. حتي يأتي دورك! )